

Hanc ueteris ecclesiae consuetudinem superstitiosorum rituum cultu et obseruationibus in regno pontificio sublatam atque deletam, ut reuerendus pater ac praeceptor noster et sincerioris religionis instaurator doctor Martinus Lutherus^a reuocaret in ecclesiam praecipua doctrinae christianae capita, methodo catechetica interrogationibus et responsionibus distincta explicauit, quae primae aetati a teneris priuatim et publice in ecclesijs et scholis harum regionum magna cura inculcantur eadem obseruata lege institutionis, ut cogantur auditores quasi sono reflexo imitari et reddere interpretationum uerba.¹² Qui uero aliquo usque progressi et aduiores sunt, quorum iudicium aetate auctum paulatim maturescit, ijs uberiores et aliquanto altius ex fonte doctrinae sacrae depromptae ac pluribus roboratae testimonijs explicationes proponuntur methodo tamen non diuersa. Atque id quidem in templis hactenus, quam in scholis obseruatum est accuratius, quod paedagogorum alij alias usurpauerint uberioris catecheticae doctrinae formas, nec ordine, nec interrogationum aut responsionum forma, nec loquendi modis congruentes. Quin etiam nonnulli ex dissidijs, quibus flagrant atque [A 6r:] concutiuntur ecclesiae et ex confusione tetra dogmatum recte explicatorum, ausi sunt aspergere multa minime conuenientia teneris ingenijs, sicut experimur, cum profectus discentium exploramus, inter quos non pauci offeruntur catecheticae doctrinae aut rudes prorsus aut de interrogatis aliena uel ambigua respondentes. His incommodis, ut aliquomodo inueniretur remedium, profuturum esse magnopere existimauius, si una ederetur certa et simplex forma catecheseos, quae post initia catechismi domini doctoris Lutheri in scholis puerilibus iuuentuti proponi posset. Nam capita in examine aut locis theologis¹³ comprehensa ac disputata, quae in ecclesiae [A 6v:] doctrina ac certaminibus exercitatum lectorem requirunt, nondum omnia commode et e uestigio pueris eruditus in catechesi Lutheri tradi possunt.

^a In F, G durch Versalien hervorgehoben.

¹² Vgl. Martin Luther, *Der kleine Katechismus* (1529), in: BSLK 499–541.

¹³ Vgl. Philipp Melancthon, *Examen ordinandorum* (1559), in: CR 23,1–102; Philipp Melancthon, *Loci praecipui theologici* (1559), in: CR 21, 601–1106 (MWA 2/1–2).